

咸豐縣志卷一

輿地志

沿革

古與郡地共屬蠻夷國周初為巴子國地後為夔子國地戰國時屬楚巫郡地秦屬黔中郡漢屬武陵郡東漢并屬南郡地三國迄晉屬建平郡齊梁屬宜都郡後周分今咸來兩縣地為烏飛縣隋因之未幾省烏飛置開夷縣以後皆屬施州唐由州改郡省開夷共為清江縣五代又分今咸來兩縣地為感化州宋為富州地尋改為羈縻柔遠州初名懿州後改安定州元廢州置散毛府後乃分今咸豐縣地以南屬散毛司以北為唐崖金崗龍潭等司明洪

咸豐縣志

卷一 輿地志

十

武五年定其地後割散毛司地之半為大田所今去縣治二十五里有散毛河蓋猶沿古之名也明史土司列傳洪武二十三年涼國公藍玉克散毛司擒刺惹長官覃大旺等萬餘人奏稱散毛鎮南大旺施南等崗蠻叛服無常黔江施州衛相去遠難應援今散毛地與大水田相連宜置千戶守禦乃廢散毛宣慰司置大田軍民千戶守禦所命千戶石山等領土兵一千五百人鎮之就地屯墾并額定酉陽黔江協濟本所兵糧歲輸銀兩麥石以為常然是時仍為土流間治大指就龍潭河為界河之南為流官屯墾地先後任大田千戶者為石山鄭瑜徐騰達楊公保張官音冉應義冉應禮冉應信蔣春邢源丁德梅世相舒成祖田茂璧張仕元蔣天

祐許成祖子孫世襲或降百戶至前清康熙時始廢世襲河之北為土司割據地金崗安撫司元置明洪武四年西早耳毛歸順尋叛二十三年定其地永樂五年置安撫司宣德三年令兼領石關崗長官司西坪蠻夷官司隆慶五年覃壁叛討平之削其爵為崗長後仍復安撫龍潭宣撫司元置明洪武四年田起喇歸順改安撫二十三年廢二十五年復置唐崖安撫司覃啟元時有功以宣慰世襲明洪武四年子直隨廖永忠征蜀降職未幾復安撫宣慰世職并領蒼蒲活龍二副司前清康熙時降長官司雍正十三年忠崗司田光祖等糾十五土司呈請歸流湖廣總督邁柱請以十五土司各境并原設恩施縣增為一府五縣更將撥隸四川夔州府

之建始縣割還特設施南府轄六縣合大田所及唐崖金崗龍潭西坪各土司地共設一縣命名咸豐周圍八百餘里縣治即大田千戶官署地乾隆元年置知縣訓導巡檢典史等官

按舊府志散毛宣撫司古蠻夷國周為巴子五溪地春秋戰國皆楚地秦惠王欲楚黔中地以武關易之即此漢屬武陵郡後周以下置縣五代為感化州宋為富州尋改羈縻柔遠州元因之尋廢為散毛崗置散毛蠻夷官司至元三十一年崗主覃順入貢陞為散毛府屬四川行省至正六年改散毛砦等處軍民宣撫司明玉珍改散毛宣慰使司都元帥明洪武七年改散毛沿邊宣慰司屬四川重慶衛二十三年又割其半為大田所編

戶一里領大旺龍潭二安撫司尋以藍玉奏廢散毛宣慰司永樂二年五月復置散毛長官司屬大田軍民千戶所四年三月陞宣撫司屬施州衛蓋散毛宣撫司領地明以來本兼大水田而有之自洪武割半設所後則上半入今咸豐縣境下半即今來鳳縣地也

又按舊府志載雍正六年湖廣總督邁柱會同巡撫馬會伯題奏湖北荊州一府管轄州縣衛所共計一十五處綿延千有餘里凡遇盤查錢糧倉庫提審命盜案件每多遲延蓋緣該府所屬之歸州巴東興山長楊四州縣施州大田二衛所俱地處山僻離府寫遠文移往返動需時日一經駁查即逾例限且界連

咸豐縣志

卷一 輿地志

十二

他省接壤土司是以田土爭訟亦倍於他邑而衛弁又無承審命盜之例每遇命案必詳委鄰邑驗審往返驗鞫更耽時日臂指鮮應呼吸不通此事多遲誤之所由來也臣密加訪查按諸輿論隨與撫臣藩司會商必須更設州縣庶於地方有益去後今據湖北布政使黃焜詳議請將歸州改為直隸州施州衛裁改為縣大田所裁去所弁歸併縣轄同興山巴東長楊三縣併隸歸州管轄刑名錢穀事件俱令該州督催彙轉歸州原有州判一員今應復設以資督緝施州衛千總裁改典史一員就近查緝其官俸役食以舊日衛所之俸薪儘敷應用再施州原有專管遊擊大田所原有施州營把總一員帶兵可資彈壓無庸

另議再施州衛原管之施南十五土司應歸縣轄令歸州兼轄
巡荆道統轄施州改設知縣典史則以守備千總衙署居住巡
檢則以大田所衙署居住歸州州判有原設衙署可以居住無
庸另議蓋造其施州衛有原設教授訓導二員取進生員一十
五名今應仍照舊制俟教授任滿再有補選之日卽改為教諭
員缺但各州縣設有祭祀鄉飲舉貢長夫孤貧花布等項銀兩
應照例逐一添設統候查核題允之日另造細冊呈請咨達等
因請題前來臣覆查歸州改為直隸州施州衛更設為縣在該
州管轄四縣則盤查倉庫審理刑名任專地近案件易結一轉
移間實於荆南要地大有裨益云云奉旨題改恩施縣七年設

咸豐縣志

卷一 輿地志

十三

官與興山長楊巴東同隸歸州十年東鄉司覃壽春以長子得
罪正法諸子不才呈請改流十一年忠建土司田興爵以橫暴
不法侵龍山改設內地經南臬審實擬罪改流俱為恩施縣地
雍正十三年施南司覃禹鼎以淫罪抗提擬罪改流又容美土
司田明如窮凶極惡覃禹鼎及覃壽春長子楚昭皆其壻也每
犯罪輒匿容美屢提不出當事以其先人從征紅苗有功置弗
問明如怙惡不悛至是特參拏問明如畏罪自經忠崗司田光
祖等糾十五土司呈請歸流湖廣總督邁柱題以十五土司各
境並原設恩施縣增為一府五縣將撥隸夔州府之建始縣割
還特設施南府轄恩施宣恩來鳳咸豐利川建始六縣省歸州

直隸改容美及所領五司為鶴峯州隸宜昌府乾隆元年定各屬疆域及文武官制一切經費悉如他郡邑焉

沿革表

後周	陳魏	齊梁	晉宋		三國	漢	咸豐縣志	秦	周	上古	恩施全境
郡及置清亭江州		梁宜置郡郡	建平郡	都中吳郡分永安	建平郡	南陵分郡屬及武	卷一 沿革表	黔中郡	郡屬戰子後子初	蠻夷國	恩施全境
江州	飛鹽水治	不州置郡縣	沙渠		巫縣地	縣郡地所屬					恩施
						之地很山					宣恩
烏飛縣	烏飛縣					之共酉陽					來鳳
烏飛縣	烏飛縣	同上	同上	同上	同上	縣陵地郡屬		同上	同上	同上	咸豐
	鹽水縣						十四				利川
置資田郡	三業州置併德		建始縣			地夷分道屬二很城山					建治

			咸豐縣志	清		
			卷	施南府	雍正六年設府三衛六	
	郭南 首府 縣附		一	恩施縣	雍正六年設	
			沿革表	宣恩縣	雍正六年設	
	子園			來鳳縣	雍正六年設	
				咸豐縣	雍正十年改	各崗 司西 地坪
	石渡 礪 粗	治八 里 官	十六	利川縣	雍正十年設	
				建始縣	雍正十四年	

咸豐縣圖



疆域

咸豐縣位於湖北者城西南二千零二十里距舊制施南府城二百四十里其疆域東至龍坪與宣恩縣宋家溝交界距縣治七十五里東南至老鴉關與來鳳縣三堡嶺交界距縣治四十五里西南至金竹泉白家河以西與四川酉陽州黔江縣交界以南與來鳳縣交界距縣治一百五十里西至水井壩與四川黔江縣長嶺岡交界距縣治一百里西北至牛池子西興壩與四川黔江縣之林水鄉交界距縣治二百一十里北西至龍嘴河以北與利川縣之石門坎交界距縣治二百四十里北至大村館龍嶺與利川縣雷音山交界距縣治二百里北東至黑崗以北之洗松坡與利川

咸豐縣志

卷一 疆域 山川

十七

縣南境之毛壩交界距縣治一百五十五里東北至石人坪與宣恩縣之太平壩交界距縣治一百零五里東西距一百八十里南北距二百四十五里

山川

咸豐一磅确不平之區也其地山多水少平原不及十之四五山之高聳而叢雜者以智信仁孝禮忠義悌及信孚里為最此數里之山皆發脈於利川縣之齊曜山一由都亭山下石板頂過馬鬢嶺而至縣境東北之星斗山為恩宣咸利四縣分界處此山高接雲霄形如春筍據舊志有積玉山者高峻積雪經春不消其南一里曰十三盤山旁有黑崗巖若城門水從中流二里許始出繞縣

北為青崖寨谷等溪其上又有一小洞伐木為欄明洪武中征蠻兵嘗經此以今考之大抵卽星斗山之旁支一由利川西南境衆小山來入縣境蜿蜒起伏突起為二僊崖與四川黔江縣接壤此山壁立數百丈山頂方廣四十餘里上有飛瀑三道下流成川又星斗山二僊崖中相距均約百里有雲霧山者當外四里之中心峭拔為羣山冠以上皆縣境最著名之山而外四里層巒疊嶂大都由此三山發脈者也內四里山脈由四川西陽州東境夾板石來分為羊蹄蓋為金竹泉為薄刀嶺為天上坪為東山坡為界坪為三堡嶺以迄宣恩之上崗坪小關山凡與黔江西陽來鳳宣恩分界之處以高山占大多數水之大者曰龍潭河源出利川縣東

南境至金崗司東行過宣恩縣之太平壩折而西流入縣境過龍潭司至唐崖司滙南河馬河二水約五里許而入大河再過大屋澗朝陽寺等處而出四川黔江縣之線壩又約千里而達涪州入大江南河自大村小村至尖山寺以下馬河自活龍坪茅壩忠塘至唐崖以下東西交滙而為兩河口併入龍潭河下流與平樂兩里伏流出口之野貓溪水滙成大河自此以下可施舫艫行三十餘里達線壩其他仁孝禮忠義悌三里中溪澗小水皆附流以入龍潭河又平陽里之羊蹄蓋南北各有小水流下樂鄉里之桐車壩至丁寨更滙樂鄉里之高灘所出水經土老坪唐家溝十字路等處北行至野貓河而為西北江此水北下五里許入天成橋伏

流二十里至斷余峽始由亂石中流出為野貓溪又數里入龍潭河下流為大河卽上所謂可施舢舨處也其不入龍潭河者惟永豐太和二里以及忠堡南北諸小水此三處之水以散毛河為幹流其自西來者一為太平溝以北之水一為石家溝以南之水其自北來者一為茶園溝以北之水一為蒿子壩以西以北之水先後合流過馬河壩龍坪等處又散毛河馬河龍坪附近均有小水自南山來入此幹河東行入宣恩縣境下忠建河而與清江合流入宜昌者也散毛河自高尖壩以上秋冬水涸春夏水亦小不逮龍潭河遠甚又西北龍嘴河出利川入黔江西南白家河出西陽入來鳳雖經縣境數十里均與龍潭河不相涉內四里中央多平

原惟北瀕龍潭河南界來鳳等處峰迴路轉不免崎嶇之苦西北江一帶灌溉有資而水患特甚其他高原大陵每遇旱魃為災農田水利每不若瀕江地方之便利云

要隘

今非閉關自守之時也而亦有鄰匪竊發不能不藉阻隘之力以防狼奔豕突之害者咸邑素號山鄉界瀕湘蜀其與外屬毗連之處率多重岡大阜在在易於扼守惟就現時情形論其西面自四川來者有活龍坪汛最扼石砭彭水入咸之要衝有石牙關亦彭水黔江入咸之要道有深溪關在縣西達西陽州有沙子場亦酉陽要道又鑼鍋坪以南之磨刀嶺璇坨此為防制川湘逸匪之形

勝地他若獨樂關在土老坪以南數里老鴉關在忠堡以南十餘里又滴水關在忠堡左側通東流司此皆防制來鳳逸匪之要路也卡門在白菓壩以東十里地此為防制宣恩逸匪之要路也又黑崗當恩利兩縣之衝大村八家台當利川全縣之衝一旦鄰匪告警皆可扼要控制又內地高山大阜以及石洞嵯岬所在皆有但非大股悍賊本地土人常有築砦修洞以深居而自衛者合全縣計之其著名者不下數十百處茲不悉登以避繁瑣

古蹟

咸豐縣有內八景外八景之說由來久矣內八景者一三星伴月月山在城內勢曲如月傍有三山峙列如星與月山相連一墨池

咸豐縣志

卷一 要隘 古蹟

二十

生香池在城北門內老文廟基旁其地多墨石墨泥水泉香美一朝霞煥彩朝霞嶺在城外東隅方曙每有霞光燦爛一積翠籠煙積翠山在城外北隅峰巒秀麗一秀屏錦嶂秀屏山在城前高聳環列若屏嶂然一青龍煙雨青龍山在城西南每嶺頭煙生卽雨煙散則晴一朝陽飛鳳朝陽山一名飛鳳山在城東南形如飛鳳一廣利源泉廣利井在城東門內其水甘美不涸或以為觀音礮下之水既供汲飲且資灌溉外八景者一僊掌高懸山在城西三十里白巖壁立形如僊掌一萬頃湖光萬頃湖在城西南百二十里與四川酉陽州接界或曰卽今酉屬瑪瑙湖是也一蒼崖瀑布瀑布泉在城東三十里卽今忠堡屯白巖砦之左一洞口龍涎洞

在城東十里卽白水之龍洞一杜塘躍鯉塘在城東三里與杜氏居址相連寬數畝內有僊鯉飛騰至今常見靈異一合水天橋在城西二十五里二水合入洞上有自生之橋高十餘丈卽今野貓河天生橋也一象鼻吸流地在城東三十里巖如象鼻兩竅空靈橫截溪流水從中過一鼃龐洞石洞在城東北五里內產鼃龐石斑點多姿可玩此皆騷人墨客與諸巖棲谷隱者流所常臨眺留題而流傳不朽者也蔣蔭亭廣文文菊人明經題詠尤多

按瑪瑙湖當前明時隸大田所為冉楊二姓千戶屯墾地文菊人明經詩西南民戶僥天幸萬頃湖成萬頃田可知八景之說由來已久不必其為改土歸流後好事者所點綴也

咸豐縣志

卷一 古蹟

二十一

韓信坡舊府縣志謂在縣城西門外半里許相傳信亡楚歸漢寓此按史記淮陰侯本傳漢王之入蜀信亡楚歸漢又高祖功臣侯年表淮陰侯初從項梁梁死屬項羽為郎中至咸陽亡從入漢為連敖典客咸陽入漢此非必由之路坡之得名殆別有所據不必其為亡楚歸漢時也

桃源古洞一在土地坪右側一在大屋澗南岸相傳漢季土人避難其中前清咸豐同治間有人曾至其地掘出五銖制錢不少又得古鼎數事上鐫小篆隸書模糊不易辨識大指為秦漢時故物適遠商經過重貲購以去

太康古碑在縣署前相傳晉太康時鐫設縣後掘出樹常平倉外

唐大令方耀署中卽事有尚有邑人話太康之句咸同兵燹遂斷殘無存按三國志吳主休永安三年分宜都郡置建平郡領信陵興山秭歸沙渠四縣是時晉有建平都守尉領巫北井泰昌建始四縣晉武帝咸寧元年改都尉為郡於是吳晉各有建平郡太康元年吳平併合當其先陸抗請增兵王濬治樓船皆汲汲以建平門戶為重則此十餘年中經營生聚建設必多迄於太康歸命錫封人民安堵碑之建於是時為紀事銘功理或然與歌羅山在縣城西南隅今訛為高羅山唐李白曾過此聞杜鵑後黃山谷宿此夢聞李白述其竹枝詞三首文菊人明經著有歌羅驛考卽謂此也

碧山在今平陽里楊崗亦以李白詠此得名楊情田明經集里人建寺其上郡屬官紳題詠甚多

單葛洞在縣署後右側明洪武初年涼國公藍玉統兵征散毛諸崗駐兵於前面後因此設所官衙署

龍潭土司故宅在縣治東北六十里金崗土司故宅在縣治東北一百里唐崖土司故宅在縣治西北六十里明天啟時宣慰使覃鼎建有石坊勒荆南雄鎮楚蜀屏藩八字今尚存前清雍正十三年廢為通判署道光十二年裁西坪土司故宅在金崗司西境或曰卽今活龍坪距縣治西北一百八十里明初唐崖土司分置右副司以秦國龍領之前清初年廢

硝場在今縣治北一百里懸巖高聳下有津渡其半巖一孔勢若城門中產硝甚多載明一統志今雖仍產硝不復若古昔之暢旺矣

蠻王石碑在今縣西九十里相傳古蠻王樹此字跡年久磨滅國公寨在金崗司土司覃壁叛明命將參政馮成龍監軍副使張大業平之其屯兵處今名國公寨

悔寨去國公寨數里覃壁畏罪逃其上朝廷以其尚知悔悟赦不誅削其爵降為崗長使主其地故名

興國寺在縣治西門外半里明洪武十三年創建置備莊嚴景泰時按察僉事沈慶詩曰公餘幾度訪招提寶殿陰廊人望迷曲曲

咸豐縣志

卷一 古蹟

二十三

檻幽雲作路登登山險石為梯志情駐節從吟賞適興凭欄任品題珍重道場傳世業宗風千古繼曹溪正德時指揮僉事童泉詩曰撚指重遊又攝提蒼梧老木半淒迷簾含河水魚鱗畝石次餘霞雁齒梯半日有緣隨衲子百年無警到雕題吟成擬叩傳燈事歸促花韉月滿溪名勝蓋可想見隆慶萬歷時補修尤稱精潔迄於前清數朝皆為縣中名勝地近三十年來乃日就衰頹雲霧山在縣治北九十里山最高登其顛可周覽百餘里上有雲霧古剎建自有明成化年間土人立有碑誌

石人石馬在今唐崖司桓侯廟內相傳明時土司所鑄馬俶儻權奇勢若騰驤石人執轡其旁如控馭狀馬高五尺人亦稱是石工

精巧為近時所難得

楊崗在平陽里明成化十三年奉上諭四川西陽宣慰司冉雲
帶領官軍深入九甫塘茅坪排崗楊崗清水塘白崖塘等處剿
苗殺寇勤勞可嘉特進階為明威將軍是為楊崗見載籍之始